

A' mundana di Totò

«Cammina, su, non fare resistenza! »
diceva 'o ' brigadiere, e 'a strascenava.
« Sta storia adda fernì, è un'indecenza! ».
« Chi sa c'ha fatto » --- 'a ggente se spiava.
« C'ha fatto ? » --- rispunnette 'nu signore.
« E 'na povera dda... è 'na mundana ».
« E 'a porteno accusì ? Gesù, che core! »
murmuliaie Nannina « 'a parulana ».
« Lassateme... nun aggio fatto niente! »
« E lass' 'a jì » --- dicette 'nu cucchiere
« ma vuie 'e vvedite quanto so' fetiente? ».
« Nce vo' 'nu core a ffa' chillu mestiere ».
« Sta purtanno 'o brigante Musolino »
se mettette alluccà Peppe 'o Fravaglia »:
« Si 'o ssape Il'onoreuole Merlini
'o fa 'a proposta p' 'o fa' avé 'a medaglia ».
Quase ogne ghiuorno, 'a povera figliola,
appruffittava ca 'na carruzzella
a Nnapule scenneva d'Afragola
pe' 'nu passaggio fino 'a Ruanella.
'O nome? Nun 'o saccio.
Saccio sulo ca 'e ccumpagne
'a chiammaveno « 'A pezzente ».
Pe' sp-aragná, 'a sera, dduie fasule,
e, spisse vote, nun magnava niente!
Cu' chelle ppoche lire ch'abbuscava
aveva mantené tutt' 'a famiglia;
e quanno 'e vvote po'... nun aizava,
steva diuno 'o pate, 'a mamma e 'o figlio
'O pate, vecchio, ciunco... 'into a 'nu letto
senza lenzóle, cu' 'na cupertella.
E 'a mamma ca campava pe' dispietto
d' 'a morte e d' 'a miseria. Puverella!
A piede 'o lietto, dinto a nu spurtone,
'na criatura janca e malaticcia
pe' pazziella 'nmano 'nu scarpone
e 'na tozzola 'e pane sereticcio.
Nun appena fuie 'ncoppa 'a sezione
se mettette alluccà comme a 'na pazza.
'E strille se sentevano 'o puntone.
« Ch'è stato, neh: Ched'è chisto schiamazzo ?
« Avanti, fate entrà sta... Capinera »

dicette 'o cumissario a 'nu piantone.
E 'o milite, cu grazia e cu maniera,
'a votta dinto cu 'nu sbuttulone.
« Ah! Si' tu? » --- dicette 'o funzionario
« Si nun mme sbaglio, tu si' recidiva?
Si' cunusciuta ccà a Muntecalvario.
Addò t'hanno acchiappata, meh, addò stive? »
« All'angolo d' 'o vico 'a Speranzella.
Stevo parlanno cu 'nu marenaro,
quanno veco 'e passà 'na carruzzella
cu' dinto don Ciccillo 'o farenaro.
Don Ciccio fa 'nu segno: « Fuitenne!
« Curre, ca sta passando 'o pattuglione ».
'I dico 'o marenaro: « Iatevenne.
Stu brigadiere 'o saccio... è 'nu 'nfamone ».
« A legge è legge » --- dice 'o cavaliere
« nun aggio che te fa', ragazza mia.
I' te cunziglio: lassa stu mestiere,
e lievete pe' sempe 'a miezo 'a via ».
« E che mme metto a ffa', signore bello,
'a sarta, 'a lavannara, 'a panettera?
Spisso mm' 'o sento chistu riturnello.
« E truòvete 'nu posto 'e cammarera! »
« Signò, dicite overo 'o pure apposta?
Vulite pazzià? E nun è umano.
V' 'a mettisseve dinto 'a casa vostra
chi... pe' disgrazia ha avuta fa 'a puttana ?! ».